

愚

齋

存

稟

愚齋存彙卷第五十目錄

電報二十七

浙撫惲菴帥來電

袁慰帥來電

寄汴撫于中丞

寄北京慶親王李中堂

張香帥來電

寄北京慶親王李中堂

寄袁慰帥

寄西安榮中堂

江督劉峴帥來電

寄北京慶親王李中堂

寄 行在軍機處

寄北京慶親王李中堂

又

又

又

寄北京慶親王

袁中丞來電

劉峴帥來電

寄 行在軍機處

寄劉峴帥

寄慶邸李相

寄 行在軍機處

李中堂來電

寄北京慶親王李中堂江督劉峴帥鄂督張香帥

袁中丞來電

寄陝撫岑雲帥

寄粵督德靜帥湘撫俞廩帥

西安王中堂來電

寄江鄂督帥山東撫帥

又

西安岑中丞來電

寄慶親王李中堂

寄 行在軍機處

寄北京邸相江鄂督帥山東撫帥

袁慰帥來電

寄西安王中堂

寄江督劉峴帥鄂督張香帥

行在軍機大臣來電

日本李星使來電

劉峴帥來電

袁慰帥來電

寄慶邸李相

寄江鄂川督帥山東撫帥

寄劉峴帥

劉峴帥來電

又

寄慶親王李中堂

寄張香帥

又

王中堂來電

袁慰帥來電

又

日本李大臣來電

寄 行在軍機大臣

寄慶邸李相

寄北京慶邸李相江鄂川督帥山東撫帥

行在軍機大臣來電

又

寄江鄂督帥山東撫帥

寄西安王中堂

又

寄江鄂督帥山東撫帥

寄行在軍機大臣

寄西安榮中堂

劉峴帥來電

峴帥致慶邸李相電



愚齋存彙卷第五十

電報二十七

浙撫惲菘帥來電

光緒二十六年十二月初四日

頃轉到邸相冬電謂此案不悉原委應查明各員  
情罪分別電復以便轉商等語日前曾咨之件恐  
難剋期到京仍應將官紳所犯案情及我等擬定  
辦法並緊要各節摘要先行電復來電言重懲一  
人餘可減罪尙未悉重懲者實不止周之德一人  
蓋外人所歸罪於鮑者謂近在道署不加保護不  
知周之德不造縣官通匪之謠則吳令不致被戕

教士卽不致延害又所歸罪於喻者謂手握兵權並不救護不知非徐攀英攔阻於前壅蔽於後則鎮兵早派亂民解散何致釀成重案是周徐實係禍胎其罪浮於鎮道二人旣伏其辜鮑喻自可輕減此係的實案情擬辦可云允當至紳士皆罪不至死且有無辜株連者今不問皂白悉予駢誅未足以服人心且欲將徇紳概革功名責令認攤賠卹道迫過甚實恐激成事端望我公酌照以上各節挈名會電邸相懇卽據情與薩使晤商卽託轉商政府庶幾及時補救尙可轉圜尊意當以爲然

袁慰帥來電

十二月初四日兼致岷帥香帥

東三省疆土一齊失陷地方糜爛遺害公家胎憂  
君父東南各省遵守約章疆域無損接濟無缺  
補救危局維持國祚是非得失判然易見倘各省  
同作孟浪勢必瓜分安有今日如東三省者何損  
於人何益於我說者謂各省合力必可制勝抑知  
甲午之役各省不足抵一國況乎各國徒欲啟人  
以利自取覆亡使我無一片乾淨土但傅相在局  
中似不便言請宮保囑佑文飛函略略痛切詳陳  
或可得一紙息眾喙醒羣迷請酌裁

寄汴撫于中丞

十二月初五日

支電感甚木價若由電局出名託地方官購買無不昂貴此次係因 兩宮回鑾特設電線以通 詔奏不涉商事台端馭下嚴密務請札內聲明鄙見不欲累及地方亦不可不予限制昨與政府約擬將電局本年報効捐款四萬兩造此線由潼關至保定連線料機器一切在內則木價每支連運費不可出一兩全賴盡籌不勝感禱

寄北京慶親王李中堂

十二月初五日浙撫惲會電

薩使屬開詳單允可電商政府設法茲將各員分別輕

重擬呈鈞核衢案係土匪所爲江山縣失守衢郡內亂  
西安知縣吳令被戕卽延害教士鎮道並無指使與毓  
賢迥異領事歸罪鮑道者謂近在道署不加保護不知  
都司周之德不造謠言則知縣不被戕教士卽不延害  
又所歸罪喻鎮者謂其有兵不救不知非巡捕徐攀英  
攔阻壅蔽則守城鎮兵或可分撥將亂民解散二人實  
係禍胎擬正法民犯供認戕殺教士者十名均擬正法  
鮑祖齡擬發極邊永不釋回喻俊明擬新疆洪守思亮  
擬軍台內如徐攀英非原單所及可見情罪允當決不  
姑寬紳士皆罪不至死并有無辜牽連者若不問皁白

悉予駢誅且欲將衢紳概革功名逼脅過甚恐激事端  
惟有將所指之羅道紳王品三鄭連生分別監禁管束  
卹償則從優公議至劉前撫榮前臬嫉視洋人未見實  
據撫署一接上海保護之電卽行文加意保護衢案之  
外不及其他卽非嫉視之證霍領意欲格外加重焜耀  
外邦月餘不肯會晤薩使公正顧念大局乞卽據情與  
商託其轉商政府庶可結束

張香帥來電

十二月初八日並致劉峴帥惲崧帥

甯冬滬東浙冬電前夜始到衢案英使所擬太重  
萬辦不到彼知中國性情好磨故索高價以待還

耳此事似不宜徑商外部薩使必推霍領必怒更難疏解此時入手第一層先須勸霍與杏翁晤面見面方有轉機第二層與霍辯論似只宜言官庸劣無能自己救死不暇不能彈壓亂民絕無主使之據不宜論爲江山土匪蓋土匪在外縣不在衢城此戕官殺教之亂民卽守郡城拒外匪之團練也我語稍有不實彼將全然不理第三層似只宜言不可戮及無辜外國重法律重真犯不必以紳民太多爲辭若云眾怒彼將自派兵往矣然空言辯論彼斷不聽惟有勸霍領派員赴浙觀審按律

科以應得之罪能允此卽有辦法矣但恐無論如何總須加重不辦真正主使之紳必不能行姑不論教案卽專論戕縣官署內三十一人其主使之紳豈可不誅戕官之人卽殺教之人也望峴帥設法勸霍領與杏翁晤商鄙人亦當設法勸之至霍領不見必有情節杏翁必知此案樞紐全在霍一人承詢聊抒管見請三公酌奪示復

寄北京慶親王李中堂

十二月初八日

行在庚電開奉 旨密諭奕劻李鴻章知悉董福祥帶兵無狀獲咎甚重 朝廷不卽加以重罪者特因其久



縮兵符爲陝甘兩省漢回兵民所傾嚮若辦理稍涉操切董福祥一人不足慮而兩省愚民悍卒罔顧大局深恐一時鬨動驟成巨禍爾時平民旣遭慘劫而兩省教堂必首受其害不可收拾所以不能不躊躇審顧者以此否則朕於親郡王之在案者尙不肯稍有迴護何獨袒庇董福祥一人此情當可共諒也前已撤去該部勇隊五千餘人原期漸撤兵權撫定人心徐圖辦法現擬明發諭旨只含而不露至革職而止以後如何嚴懲斷自朕衷總之此人斷無輕縱之理惟事須相機辦理不能剋期預定耳著奕劻李鴻章將此密旨轉各使

以釋其疑是爲至要欽此宣謹

寄袁慰帥 十二月初八日

慕韓電六月戶部議准兩江籌餉捐照海防例減作三成係峴帥奏請故未咨行山東自應援案奏請等語此開甯捐尙旺東捐多一成自必分文無著

寄西安榮中堂 十二月初十日

德王親至英廷弔唁德英交密恐於東三省俄約動效尤之念前請借弔賀專使修好峴帥意甚合乞中堂奏定全局必有益

江督劉峴帥來電

十二月初十日並致香帥恭帥

鄂虞亥電悉前因此案必須由霍領入手方能轉  
圖當託甯英領切實轉致與杏翁面商現得孫領  
復謂接霍領函此案由駐京使會同傅相商辦伊  
不詳如何辦法不便干預是以未便接見與盛毫  
無芥蒂等語似此互相推諉無非意在要挾拖延  
愈久變態愈多請杏翁據霍語再電傅相總須接  
晤方有辦法

寄北京慶親王李中堂

十二月初十日

行在蒸電開奉 旨奕劻李鴻章陽三電均悉增祺未  
經奏明擅派周冕赴旅妄立暫約荒謬已極業已照部

議革職現又經具奏擬徑行赴旅與提督面議接收事宜必更枝節橫生著卽迅速電飭剋日回京不准擅議接收此 旨並卽轉告俄使前已有 旨令清銳暫署盛京將軍矣楊儒來電籌辦爲難情形均悉仍著轉電該使堅持磋磨力圖挽救從緩妥商全在楊儒之隨時因應也德使碑文著照所擬辦理欽此宣謹轉

寄 行在軍機處

十二月十一日

初十電 旨除照轉慶李外已密遵摘錄催增回京尤要在阻增赴旅但東三省電線均爲俄佔難通密電擬專譯員赴旅順由旅沿途巡投接信後或可折回但恐

不及綽將軍十三赴旅當密告遇增卽屬託病回京近日中俄條款已由日本傳來遍登洋報各國議論紛紛恐羣思效尤而致觀望此事本宜後辦也

寄北京慶親王李中堂

十二月十一日

頃奉軍機處庚電開豔江兩電均進呈所請密旨電全權言明董罪從緩相機籌辦之故以釋各國之疑一節面奉諭旨謂董福祥之難遽重辦不在其本人而在陝甘之愚民悍卒以其素得回漢民心舊部甚眾非從容徐撤其兵權復設法安撫回漢民心方不至激生事變斷難定日月之久暫設許以緩辦彼復迫我以重

辦後始允撤兵仍屬不了今姑擬密旨電交盛宣懷  
電商全權大臣如不至迫我刻期必辦始允撤兵則可  
出示密旨向商使之釋疑撤兵等諭希卽欽遵酌辦  
又迭次京電只云第一二三四共五條先辦卽可勸  
令撤兵今來電又云聞懲禍賠償兩事不妥必不撤兵  
果爾賠償一事必須從容籌商決非急切所能就緒若  
藉口仍不撤兵卽許緩辦董罪仍不濟事請查明此語  
確否速電復云

又十二月十一日

行在齊電開奉旨據錫良電奏法兵忽到五虎嶺欲

進廣昌並稱係直隸地方已劃歸法國囑山西各營趕  
緊退出免起兵端業經該撫派員前往開導阻止請電  
京告公使派兵等語現在和議大綱草約既經畫押法  
兵何以仍復西進廣昌雖係直境實爲山西門戶且直  
隸劃歸法國之說又從何而來着奕劻李鴻章迅與法  
使據理商阻毋任肆擾爲要欽此宣謹轉

又十二月十一日

奉樞電命將蒸電 旨摘錄增事設法寄增作爲宣處  
關照愈速愈妙俾其早日得知回京免再滋事是爲切  
要等因俄領事云增初六到旅恐已開談綽准十三由

滬繞烟赴旅擬摘錄 諭旨帶交函囑託病回京一切  
均聽楊議如增又開談應如何辦法阻止而不著痕跡  
務乞指示機括以便密告

又 十二月十一日

樞庚電而奉 諭旨將擬 密旨交宣電商鈞前如不  
迫我刻期必辦始允撤兵則可出示釋疑是 聖意仍  
慮在速辦恭閱鹽奏應如何嚴處隨後重辦必須切實  
聲明數語證以所聞苟能重辦不在遲速細譯 密旨  
雖稍有抑揚總勝於無明降之外此 旨似須一併照  
會而照會之中略加切實只要能緩似可由鈞處再奏



至兵費大概數目眾人皆云撤兵前必開口頃託德克  
領事電德使能否俟撤兵後回鑾再議作爲宣因奉  
調故詢其早遲鈞處如確知能從緩議乞鈞示俾可復  
樞

寄北京慶親王

十二月十一日

盧漢達京枝路先經奏准嗣津榆又奏阻交總署總局  
仍未議定比工程司沙多屢請復奏力爭以保盧漢利  
權方能抵還洋債婉勸靜侯公斷尙能遵照奉沁電始  
知法國拆毀西便門城垣遽行動工未據工程司稟聞  
實堪詫異卽飛電漢路調回沙多頃始到滬正言商阻

據稱此非工程司號令或以比法使以津榆路既可拆  
永定門直達天壇亦欲盧漢路直抵西便門如欲商阻  
必須兩路均阻方稱平允等語查各國外交此得利益  
彼必效尤條約所載利益均沾殊不易破請查示津榆  
鐵路有無直達天壇之事如係謠傳自可電商比法使  
盡力阻止

袁中丞來電

十二月十二日並致峴帥香帥

探電俄廷議十二款大致仿旅順條約擬在東三  
省駐兵政賦官兵均歸俄管轄增祺妄稱全權私  
定條約九款始終未奏初七赴旅已議革職云果

爾東三省屬俄矣恐各國效尤變其宗旨請三公查明稍救協而謀我禍烈如此可痛

劉峴帥來電

十二月十二日並致香帥慰帥

濟文電悉此次機括首在各國不佔土若俄開端各國效尤瓜分禍成全局危殆惟有由傅相趕緊向俄聲明另議一面嚴劾增祺請明諭拏問治罪崇厚真全權且交刑部況假全權乎非重辦增祺已訂之約不能作廢此釜底抽薪法祈杏翁速轉京並查詳細情形見示如須助力劾增我輩義不容辭

寄 行在軍機處 十二月十三日

頃接全權元電蒸電 旨已轉增俄使等聞信甚鼓譟云將具函牘力爭增誤在初用周繼甚悔不致再生事若清銳曾統帶拳匪俄所深惡且素未辦過交涉斷不勝任似應令增署藩督以籠絡俄將一切均聽楊議否則恐卽決裂無交收之日矣望密商樞廷設法轉圜云頃俄領事稱增初六到旅日內卽已回藩旣恐決裂只可暫爲羈縻或改爲革職留任刻卽專人由旅赴藩詢明增在旅如何措詞再行密陳

寄劉峴帥 十二月十三日

已有國電一唁一賀並聲明派專使矣應派何人公請  
試擬

寄慶邸李相 十二月十三日

昨亦慮決裂文電想已邀鑒頃奉元電已轉樞廷以事  
關全局請暫羈縻並屬綽赴旅轉告增仍回瀋候復命  
寄 行在軍機處 十二月十三日

庚電已密商全權頃接邸相電開辦董 密旨擬俟會  
議時如迫我剋期必辦則出示釋疑連日與各使密談  
似已略知辦董之有害大局惟又注重端瀾耳至兵費  
一節向例須議定數目限期始允撤兵頃德瓦帥知照

各使所索懲辦禍首如果照辦確有證據各國所索兵費亦如數允給則北京保定兵隊始可撤退直隸全省兵隊亦可退減等語希轉達樞府諸公

李中堂來電

十二月十三日並轉江鄂閩浙湘贛川粵各督撫帥

直隸頻年荒歉今復猝遭兵災敗兵潰勇分路搶掠加以各國聯軍布滿境內時出騷擾沿戶搜掠到處勒索困苦情形從來未有亦各省所無明年和議倖成非振撫不能全活擬照山陝例開辦實官振捐統收分解惟款難驟集待用甚迫務懇每省墊淡四五萬兩俾應急需俟收捐歸還由盛宗

承隨時商催匯解三輔子遺水深火熱迫切待命  
無任感禱

寄北京慶親王李中堂江督劉峴帥鄂督張香帥月十二日

國電寄英文曰 大清國 皇太后致唁大英國大

嗣君主苫次前據出使大臣羅豐祿電奏驚悉貴國先  
大君主崩殂之耗不勝悲感當命皇帝專電唁慰並另  
派專使敬代致奠余追念先大君主臨宇六十餘年豐  
功偉烈震鑠寰區與中國交涉事宜商務尤多至深且  
久余垂簾聽政先後垂四十年睦誼素敦兩心相契彼

此交際日見親密方冀克享期頤永言和好忽聞愕耗  
倍切愴懷尙望大嗣君主勉抑哀思親承庶政用副寰  
球企望之至意元宣謹轉

袁中丞來電

十二月十四日並致峴帥香帥溥督  
張安帥

頃秦電本日有改絃更張 明諭有取西國之所  
長補中土之不及等語令中外大員各抒所見必  
期施行並有稟承 慈訓母子一心之句千餘  
言明日始發抄榮相面奏擬仿議院設公所督催  
趕辦現 兩宮甚和大局當有轉機

寄陝撫岑雲帥

十二月十四日



前奉 諭旨勸辦振捐實已強弩之末茲有進士出身  
浙江在籍三品銜工部郎中劉錦藻立品端謹居心好  
善聞陝省奇災情殷紆難變產倡捐庫平實銀六萬兩  
似此鉅款足以拯救數萬災黎實屬見義勇爲今所罕  
見據勸捐委員稟擬請奏懇 恩施格外優擢以五品  
京堂候補以示鼓勵查邢傳經近捐振款一萬兩已蒙  
特賞四品卿銜今劉錦藻報効銀數六倍之多且係  
通籍部員似無不合惟京堂非臣下所得指請必應出  
自 特恩可否請台端先與樞廷妥商或當面請 旨  
如果可行候電示再行傳諭繳款電請尊處入奏乞速

復

寄粵督德靜帥湘撫俞廩帥 十二月十五日

速轉前廣東學台張總憲頃奉軍機處咸電奉 旨張

百熙已派充頭等專使大臣前往英國唁賀著盛宣懷

電催該大臣迅速前來 行在請訓欽此除閣抄另轉

外查英君主薨逝 兩宮已分致國電唁賀聲明派

專使前往 上意甚重此行公接此電 旨請卽迅赴

行在並將起程日期先行電奏以慰 聖厪

西安王中堂來電 十二月十七日

劉錦藻報効鉅款六萬五品事屬可行惟須由尊

處或本省浙撫具奏不指明何項但援刑案比較請破格加恩到時自當心照惟須提明專歸義紳嚴某等放振庶佑之不至虛此一行若推陝撫奏必歸官振嚴將無可藉手此中畛域甚明也戶部奏調嚴摺內係指請閣下籌濟閣下專濟嚴係遵奏案似無嫌疑如劉性急電奏亦可新浙帥尙在滬或會奏何如嚴至今未到盼極

寄江鄂督帥山東撫帥

十二月十八日

邸相篠電奏今日十一國使臣會議懲辦禍首各使宣說圍攻使館兩月由王大臣主使現經查出獲咎較重

數員如端王莊王董福祥載瀾英年剛毅趙舒翹及續  
經查出啟秀徐承煜並案外仇殺教士戕害外人之毓  
賢仇視洋人信拳恨教攻使加功之李秉衡內除已死  
者應追革官職撤銷卹典外其現存各員均應予以死  
罪以謝天下各國臣等力辯原條款有分別輕重盡法  
嚴懲之語茲所言毫無分別未免矛盾伊等言此卽盡  
法嚴懲之最輕者又問啟秀徐承煜向所不及何忽添  
此二人伊謂條款內原有日後各國指出之人此二人  
續經查訪實係罪魁不得分別先後啟秀軍機兼總署  
以權力庇縱拳匪嘗謂洋人可以殺盡徐承煜凡徐桐

所言所爲暗中主使與洋人不兩立殺戮總署忠良諸臣皆其監斬亦其預謀告以端王懿親礙難加刑現擬躬往新疆監禁永不釋回與死何異伊謂何不予以假死罪如斬監候一二年後再發新疆以示曲全莊王董福祥窮兇極惡非殺不可告以我等擬請莊賜自盡董先革職後再嚴懲因出示庚電 密旨一道伊留傳觀再說伊謂端旣曲全載瀾英年皆助端莊爲惡趙舒翹身爲刑部操生殺之權又當樞譯重任釀成大變均非殺不可告以載瀾亦係懿親只能遣戍永不釋回亦足蔽辜伊謂英年無可逃罪又告以趙舒翹樞譯皆不當

家刑部殺立徐等非伊作主至重亦不過永戍新疆至  
啟秀徐承煜雖聲名平常所陳罪狀毫無證據監斬乃  
照例差使未必預謀均宜貸其一死毓賢殘忍嗜殺擬  
請正法各使多不謂然擬再自行會商卽具照會請奏  
德使起而言曰似此重大案件僅殺兩人各國斷不甘  
服看來和局難成八萬重兵亦難遽撤此事如何得了  
臣等不敢壅於上聞只有俟公照會來再請 旨乞秘  
宣謹轉

寄江鄂督帥山東撫帥

十二月十八日

邸相密奏俄格使函稱聞中國有換現任盛京將軍之

說本大臣視爲危險前奉 旨令增祺仍回本任經我  
政府所理會而本大臣轉達本國大憲者方有暫訂治  
理該省事宜歸於該將軍之議今突見撤任則於楊欽  
使在俄都所奉委辦商議之動靜如何不利於中國可  
想而知等語聞旅順阿提督密電於此事大爲不平增  
在旅並未聞如何開議事關交收東省大計似不得不  
俯順洋情可否仍令增祺署理將軍之處伏候 聖裁  
若另易生手誠恐決裂云乞秘宣謹轉

西安岑中丞來電

十二月十八日

劉君錦藻事非臣下可請誠如尊諭婉商樞府均

謂難必惟災振需款孔亟思欲援林維源成案一請劉君如能湊足十萬煇當爲陝民冒昧奏請獲咎勿辭若僅此數似覺不直如何請公代酌復達劉君至叩

寄慶親王李中堂

十二月十九日

奉 旨奕劻等轉增祺元電悉交還東三省前已有

旨授楊儒爲全權大臣悉應由其在俄妥商辦理今增祺復在旅擅行商訂約章必致又爲所藉口著該親王等速電飭增祺迅回盛京毋再多事干咎欽此宣謹轉寄 行在軍機處 十二月十九日



頃閱全權送各使說帖內開第六款中國國家須籌之各國所能允從之理財辦法以爲擔保如何賠補各款須量中國之力或定年限或推情量減必須通盤籌畫中國歲入歲出各款爲諸國所深知此次賠款又係額外添出凡中國籌款有可設法增益之處如加關稅礦稅通郵政行印花稅之類各國現已通行諸望鄰邦一體照允並聲明以上各節附註開來各款之後卽爲將來議約底本云謹錄呈備參考

寄北京邸相江鄂督帥山東撫帥

十二月十九日

本日電 旨奉 旨奕劻李鴻章篠電悉懲辦首禍辦

論數月和局大綱第二款內載內有分別輕重之說今忽改稱均應論死是原定條約不足爲憑實屬自相矛盾至日後二字前據電奏難以劃清界限但必須實有案據方可懲辦今又指出啟秀徐承煜均係空言毫無實據似此有意刁難是何意見抑係因東三省俄約不妥因而藉端觀望現在各國照會尙未送到該親王等務當先行照會切實剖辯務就範圍並設法探明其反覆之由密速電奏爲要欽此宣謹轉

袁慰帥來電

十二月十九日兼致岷帥香帥

初十明降想已恭讀三公當各有建白可否見示

此項文章自未便聯銜然以大意合符爲貴尊意

云何

寄西安王中堂 十二月十九日

劉錦藻報効六萬正在收繳接岑復須湊足十萬劉做  
不到旣爲義振救民此閒不妨入奏但恐另賞別項無  
以對劉擬先公電樞垣候復再奏此款繩伯勸來可否  
將勸捐委員銜名隨案并請優獎嚴已過豫不日可到  
乞密示

寄江督劉峴帥鄂督張香帥 十二月十九日

頃接樞廷效電屬轉鈞處如下各使在京所議各款懲

辦禍首一節前已言明分別輕重現忽改議一律從重  
是否因東省交還條約多不妥協故意作難觀望抑係  
別有意見希貴大臣悉心訪察密速電知並望設法從  
旁解救轉圖爲要云京奏十七所議似不出大綱第二  
款全權前與各使計議本屬含糊今逐條分晰乃始全  
行揭破效電 旨恐做不到兩帥有何妙策免致決裂  
乞速示

行在軍機大臣來電

十二月十九日

嘯電已代進呈所請頒國電所見甚是惟各國情  
形不同應分幾稿貴大臣熟悉洋情希卽分別代

擬電知本處再行斟酌辦理各國聯軍在直隸各州縣洋兵教民勒取銀錢爲數甚鉅自應歸入卹款計算並希貴大臣向各領事婉達此意并可否於國書敘及希酌辦

日本李星使來電 十二月十九日並致峴師香師

頃外部言端邸瀾公不加刑董緩辦經日本力勸各國便可允惟欲重懲趙啟英及徐承煜勸阻皆不聽鐸謂趙等不盡袒匪外部答各國怨其堅持守舊致釀鉅禍又各國有請昭雪徐用儀等五人之意各等語合電陳乞轉榮王兩中堂

劉峴帥來電

十二月二十日兼致香帥慰帥

濟皓電悉我輩建言應以可行爲主濟電須大意相同極是近日焦思苦無良法尊處議定後乞將大綱見示瀝嘯電外人要挾雖甚體察情形恐非二人所能了事

袁慰帥來電

十二月二十日兼致峴帥香帥

甯嘯瀝兩電悉首禍未能早辦致夜長夢多終歸於不能保全連得行在書兩宮極和銳意維新甚盼疆臣條奏採施甯電以可行爲主語極妥要請香帥先擬大綱見示俾有遵循愚見變法

須有層次由淺入深乃克有濟統祈裁酌

寄慶邸李相

十二月二十日

行在國電茲有寄俄國書一道文曰 大清國 大皇帝敬問大俄國大皇帝好朕維講信修睦爲國之常經救災恤患交鄰之盛事中國與貴國交好二百數十年從無纖芥之隙本年六七月間中國京城亂民滋事一時撲滅不易蔓延及於東三省疆吏不善處置致煩貴國用兵是貴國代我勦平匪亂非與中國有隙也及各國聯軍入京貴國首先撤隊出都以明不貪土地之意並許貴國在我東三省兵力所及之處一律歸還義聲

昭著環球各國無不欽仰朕前經兩次電書致謝諒邀  
鑒及茲聞貴國政府與統兵官持議頗異於前欲將東  
三省政權隱由貴國主裁而中國所得特一空名者如  
此則歐美各國勢將羣起效法有妨中國內治之權朕  
知尊意必不出此竊思大皇帝篤念邦交信義昭著欲  
結歡中國之盛心至優且渥今日之事尤賴貴國主持  
爲各國示之準則中國與貴國毗連之界二萬餘里唇  
齒相依他日苟有可以報答大惠之處當惟力是視所  
有東三省現築鐵路關繫緊要自應照常經理夫鐵路  
之利非獨貴國重之卽中國亦賴之也朕斷無漠視不



加保護之理此次保護不力之疆吏已重加懲治以後當嚴飭地方官防患未萌盡力保衛務愜貴國之意朕昨已派楊儒爲全權大臣以便就近從長計議惟願大皇帝念我兩國多年友好與他國不同鑒朕此心俾我東三省政權無損悉照從前辦理庶幾兩國生民樂業和好永敦朕實有厚望焉除電楊大臣外宣謹轉

寄江鄂川督帥山東撫帥

十二月二十日

邸相寄奏頃據各國使臣會銜照稱在京肇亂行兇各事昨經諸全權大臣將專責較重異常獲咎之王大臣陳述並將各該犯照所得罪戾應如何嚴懲之處逐一

指明貴王大臣於此節持論各端諸全權大臣均已聆  
悉亦皆考查此事如何由諸全權大臣核定特爲奉達  
其日後由諸國大臣指定外省獲罪之員不能徧袒辨  
駁貴王大臣所擬莊親王載助令其自盡諸大臣照允  
至端郡王載漪輔國公載瀾諸大臣核定均必應斬監  
候如蒙 上裁似應卽行加恩貸其一死極輕當發新  
疆永遠監禁不得再行遞減英年必當斬立決剛毅亦  
當定以斬立決旣係已死其干係地步例應與生罹斬  
罪者同趙舒翹應斬立決至所稱毓賢一犯必當斬立  
決諸大臣意見相同至董福祥一犯日後如何定罪貴

王大臣所許各節諸大臣已經記錄存案照諸大臣之見莫若從速先行奪其兵權則照許施行豈不較易李秉衡徐桐均當定以斬立決既係已死其干係地步應與生羅斬罪者同徐承煜啟秀均應定以斬立決頒發此次核定罪犯案由之 上諭應立即宣示其處決之日從速指定惟無論京外諸大臣特行留派員監視管理行刑之權總之戕殺使臣及書記生兩月之久督戰官兵攻擊西人教堂各國使臣且狡設陷弄誘騙西人離京赴津以便途中加害又以極其痛恨違悖公法致害多命加罪遞摺辨駁之大員慘罹大辜等情今諸國

大臣所討辦者僅只如斯幾如無所要求至貴王大臣  
前送說帖加所列軍情各節如欲諸大臣斟酌其閒中  
國必應將此次諸大臣討辦各節首先允從施行等語  
臣等查此事關係重大不敢臆斷伏乞 聖鑒核奪電  
示請代奏云宣謹轉

寄劉峴帥 十二月二十一日

傅相號電奉 旨革職張佩綸雖經獲咎其心術尙屬  
端正辦理交涉事宜是否熟諳當此用人之際著李鴻  
章據實具奏欽此除轉京外請密交張學士

劉峴帥來電

十二月二十一日並致香帥慰帥

變法須有次第是一成不易辦法由淺入深方可  
推行盡利香帥胸羅全局能先擬大綱俾各省則  
效建議相同庶易採擇

又 十二月二十一日並致香帥慰帥

茲復樞電文曰盛宗丞轉效電敬悉駐滬駐甯各  
領先後來見初四洪夏兩主事條奏得 旨分發  
存記頗疑 朝廷陰納其說意在依違各以微詞  
探問當經喻以寬待言官自是中國政體並無礙  
和局該領等釋然嗣日領又因增與俄人私約謂  
各國聞而動心諄囑密電各全權堅持勿允免成

瓜分之漸並請懲辦首禍一款奏到卽行以堅各國之信否則藉此恐有反復情詞極爲迫切當將俄約一層密電各全權力拒此外無可訪察似亦別無意見現密商駐甯各領轉達公使懲辦務從輕減未審能否有濟謹據實復陳祈鑒

寄慶親王李中堂

十二月二十一日

樞電各使在京所議各款懲辦首一節前已言明分別輕重現忽改議一律從重是否因東省交還條約多不妥協故意作難觀望抑係別有意見希貴大臣悉心訪察密速電知並望設法從旁解救轉圜爲要並轉劉

張兩帥云鈞處前與各使計議本尙含渾此次揭開似皆不出第二款樞電所慮故意作難觀望有無此意無可訪察禍首始終難寬由王爺中堂與各使磋磨至無可再減之處必須力請 朝廷速斷以免緩則生變此閒已商劉張切實復陳並求示復

寄張香帥

十二月二十一日

近有勾引洋人赴興國勘礦者查興國煤礦關係鐵政甚重該礦山是否官產有無契據請查明示復

又

十二月二十一日

漢廠承辦數年心力交瘁今年外洋軌價大漲非尋常

可遇然綜計出入尙須賠累甚鉅現比公司因北亂停工積軌足敷一年之用故明年一年不能定軌舍軌惟有生鐵可售而銷路難恃明年將何以爲計總之外洋鐵廠成本動輒以數千萬計卽如日本新設之廠名曰鑄鐵所者問其國家亦撥三千萬我廠官商併計不過千萬自難收效目前只有兩法一照尊議自添鉅本大舉二與外人合辦免其中廢否則必至停工宣力已竭萬望指教以拯危局

王中堂來電

十二月二十一日

寄電致俄國書希照稿轉京全權並復劉錦藻捐



事電樞候復最爲老到仍照六萬五千可也勸捐  
委員將來策保則可隨案請獎則不可鈺孫尤萬  
萬不可諸維心照

袁慰帥來電

十二月二十二日

頃致榮相電文曰聞俄乘和議未定他國不能助  
我意欲據東三省兵權利權倘各國效尤大局不  
堪設想現宜急催慶李速定和局方可專力籌辦  
俄事亦可約日美英款助理論以免事久生變至  
籌辦首禍如情節較輕勢所難減只可當作殉難  
優其後裔萬毋再累 國家又電或謂諸謬究係

愚忠嚴懲恐失人心云然爲臣者不權利害不顧  
君父但憑意氣致危 宗社萬古無此忠臣譬  
如爲子者不計家室不顧父母但逞一忿忘身及  
親天下無此孝子且諸謬誤國殃民不但洋人痛  
憤中國士民亦均切齒懲之正所以維持人心整  
飭紀綱並以彰明 聖德請相機圖之云請求三  
公酌量加勁

又 十二月二十二日

啟徐已被拘聯軍斷不肯釋 行在未必肯辦再  
拖數日廷雍之事又見辱莫大焉如由邸相密囑

自裁辱可稍減一公自命清流當亦知成仁取義  
然未敢必也

日本李大臣來電

十二月二十二日並致峴帥香帥

夏秋閒尙書徐用儀等五人先後被法各國以爲  
保護外人獲罪頗有煩言迭經隨時剖辯終不肯  
信是否失當盛鐸遠使重洋其中且有向未謀面  
者未敢深論惟均聞其立朝多年素稱謹飭平日  
並無劣跡如當時情罪有一線可原可否籲懇  
聖慈趁各國未要素之前量予昭雪俾天下知

恩出自上以存國體而釋羣疑似於大局甚有

裨益可否上陳乞鈞奪

寄 行在軍機大臣 十二月二十二日

效電除轉江鄂兩督外連日向各滬領事悉心訪察據稱全權前與各使計議本尙含渾今逐條分晰乃始全行揭破仍不出大綱第二款並非反復懿親不加刑董照 密旨緩辦已是全權與各使再三商減現聞催辦殊急似非藉端觀望亦別無意見等語又將趙啟英徐應從輕減切實解說領事允電政府設法轉圜但云徐啟已爲聯軍所獲恐難輕縱言下惡徐尤甚謂徐相爲禍胎徐承煜亦多聳恚英德又稱似此巨案只辦兩人

總恐難了並力勸早日結案免起波瀾他國言殊而意  
皆同

寄慶邸李相 十二月二十二日

行在寄電奉 旨懲辦禍首一節各國此次照會竟係  
變本加厲自應極力剖析惟往來辨論夜長夢多恐多  
延誤但必須分別輕重如能酌改遠戍固好萬一故作  
刁難意存叵測或擇要辦到如彼所云假死罪者亦萬  
不得已之舉也著奕劻李鴻章密商酌辦並查明有無  
觀望別事另有意見一并電復欽此宣懷謹轉

寄北京慶邸李相江鄂川督帥山東撫帥 十二月二十  
二日

行在箇電奉旨奕劻李鴻章等三電閱之實深駭異懲辦禍首分別輕重原約載明業經畫押該親王等迭次來電與各使屢經商詰均以朝廷所擬輕重不甚懸殊今忽改議一概從重并追咎已死之員又添指兩人明係與朝廷爲難是否別有意見著奕劻李鴻章仍照會各使切實剖辯如載漪載瀾前電信所擬已係格外加重尙可照加恩遠戍辦理英年不過隨同附和載勛旣以爲首重懲英年爲從例應減等趙舒翹查辦拳匪兩日卽回復奏並無縱庇之詞卽各國初議亦只謂其查辦不實豈能概置重典剛毅徐桐業經身故

李秉衡只爲勤王北來並未加力圍攻使館旋即殉難  
況出使大臣前次聯銜電奏據各國所指懲辦禍首諸  
臣皆有准已死不計外之說今又加罪於死後諸人不  
惟中國無此刑章卽泰西各國亦無此法律至啟秀徐  
承煜並無肇衅證據前言日後指出之員必須確有實  
據方可加罪現各國聯軍竟將大員憑空拘禁未免太  
不留中國主權務令釋回自行查明如有證據自當懲  
辦至欲派員監視行刑尤屬窒礙難行必致駭人聽聞  
激生事變此說務須堅阻當圍攻使館之時拳匪十數  
萬異常擾亂雖竭力保護仍恐或有疏虞因勸各使離

京赴津並派宋慶軍護送實爲保全起見絕無誘騙中  
途加害之意何以不諒苦衷反疑誘害所有各情務須  
逐一與各使竭力剖明總之懲辦禍首必須分別輕重  
情眞罪當方昭公允董福祥前電 旨已言明漸撤兵  
權因須撫定民心乃可徐圖至請將徐用儀等五人開  
復原官一節該員等係因屢被參劾執法懲辦並非因  
痛恨違悖公法加罪亦無遞摺辨駁之事此節亦屬誤  
會今欲請 朝廷悉予開復只期禍首擬辦妥協自亦  
不難曲從諸大國旣真心議和自當諸事持平商辦也  
務卽詳切商辦以期早日就緒勿致停議各款宕延和



局又生枝節爲要欽此宣懷謹轉

行在軍機大臣來電 十二月二十三日

養電已進 呈所擬國電奉 旨照辦文內尙未  
二字改作尙少實行新政四字改作力行實政餘  
俱照擬辦理希貴京卿迅卽分電英德俄法美日  
意出使大臣轉遞並將各國君主稱謂悉照舊式  
分別另寫毋漏毋誤爲要

又 十二月二十三日

此次兵事惟美國最爲和平卽平日交涉亦公允  
擬另致一國書贊美之並託其爲力代向各國安

商償卹事宜許以利益如台端辦理鐵路借美款  
之事似較有益如以爲然卽擬國書電達請酌復

寄江鄂督帥山東撫帥 十二月二十三日

奉 旨張佩綸著賞給翰林院編修隨同李鴻章辦理  
交涉事宜欽此謹聞

寄西安王中堂 十二月二十三日

漾電榮相代擬一稿實爲挽救全局要領如能 俞允  
應與懲辦禍首之件同日明發否則項莊舞劍意尙叵  
測

又 十二月二十三日

劉件照箇電行得復後似須具摺方得體而劉甚性急  
初十 明詔是否由衷入股手筆似係由外而入如真  
要演好戲須先挑腳色同調一心排定戲目層次不亂  
行在定計 回鑾爲第一步若仍託空言不如不說

寄江鄂督帥山東撫帥 十二月二十三日

慰帥養電已轉邸相但恐啟徐未必肯從寄略圍電破  
解愚忠二字尤爲當今要著五人請卹已准惟不允追  
懲剛徐李非特外人不服且一篇文章尙屬兩歧江鄂  
兩帥如能電奏助力便可結案

寄 行在軍機大臣 十二月二十三日

前奉 諭旨勸辦陝省義振嚴作霖日內計可攜款抵陝但地廣災重需款必多而振捐弩末無以爲繼至深焦灼茲據勸捐委員稟稱浙江在籍三品銜工部郎中劉錦藻聞秦境沉災情殷紆難變產倡捐庫平實銀六萬兩擬請奏懇格外優擢以五品京堂候補以示鼓勵前來查捐納郎中邢傳經近捐振銀一萬兩已蒙 特旨賞四品卿銜今劉錦藻係進士出身居官居鄉素稱端謹既擬報効銀數較邢傳經多至六倍核之振捐章程報効鉅款本可專奏優獎惟京堂雖係正途郎中內轉應陞之階究非臣下所得指請必應出自 特恩可

否籲懇 朝廷俯念民瘼准其報効之處伏乞鈞核俟  
奉電示再行傳諭繳款專奏

寄西安榮中堂

十二月二十三日

昨將遵奉樞電訪察各節公電復陳諒蒙鈞鑒細察各  
國情形懲辦禍首固爲報仇雪恨並欲將已故諸臣或  
虛懲其罪或追卹其寃意有鍼對實具深心若堅持不  
允誠如 聖諭夜長夢多恐多延誤尤慮俄國將東三  
省兵權利權持定不遺德英兩主新交甚固必有密謀  
日本則擬觀衅而動前以一膠澳而失旅大威廣竊恐  
後以東三省而分山東長江閩廣關繫尤大況懲卹已

故諸臣事在虛處且追懲已死中國歷朝俱有成例倘  
彼再指出故事反唇相稽更失體面數月以來天下人  
心莫不謂若而人因自矜意氣以誤國若而人因急切  
救時以喪身此閒會商各疆吏皆持定 聖旨不得已  
之苦衷以破中外之惑今爲 朝廷計得失自以速定  
和局爲上策但於國體國權不得不雙方兼顧竊謂刑  
賞者人主之大權豈可使彰明較著操之外人之手現  
在斟酌輕重固不能不與各國密商而所以曉諭天下  
後世者在 朝廷必當有權衡至當冠冕堂皇之辦法  
謹代擬 諭旨一道如可頒發不特國體國權保全不

少所有各國草約內遵奉 內廷諭旨及奉令官兵字  
句悉可不辯自明前訛後患一筆銷除與將來頒行新  
政宗旨亦一線到底請中堂深念 宗社爲重事有權  
宜造膝密陳如蒙 宸斷則渙汗大號全局俱振矣擬  
稿如下本年夏間拳匪釁起憑恃城社挾制君親所頒  
諭旨多出矯擅非秉 上裁當時事機紛擾亦曾將  
朝廷萬不得已之苦衷微言宣示中外臣民諒能默  
喻現在肇禍諸人業經分別懲辦言念往事能無痛心  
著 行在內閣將五月二十四日以後七月二十日以  
前 諭旨檢齊彙呈聽候將肇禍諸人矯傳擅造各

諭旨提出照咸豐十一年十一月十九日銷除載垣等  
造作之 諭旨辦法一律銷除錄存不得濶載方策以  
重綸音而昭信史云云是否有當伏祈垂聽

劉峴帥來電

十二月二十四日

濟養滬漾電悉啟徐自裁較全國體追懲剛徐李  
彼屬尙須加刑雖奏亦難遽允似不如俟邸相復  
奏後再酌

峴帥致慶邸李相電

十二月二十四日

懲辦首惡祇爭英趙兩人英非所知趙撫拳匪並  
無縱庇之詞九月二十二日 上諭可以徵信似



可免死永戍期得情法之平乞并婉商各使何如  
時局極危 宗社爲重和議總宜速定以安中  
外人心景仰賢勞彌殷焦盼

愚齋存彙卷第五十